

Allannguutissat siunnersuut

uunga

Uunga siunnersuut: Filmiliortarneq pillugu Inatsisartut inatsisaat

Aappassaaneerinninnermut Naalakkersuisut allannguutissat siunnersuutaat

§ 3-mut

1. § 3, imm. 3, imatut oqaasertalerneqassaaq:

” Imm. 3. Kalaallisut filmiliortartutut paasineqassaaq:

- 1) inuk danskisut innuttaassusilik, Kalaallit Nunaanni najugaqartoq, ukiunilu imminnut atasunik minnerpaamik 5-ni tamanna sioqqullugu najugaqarsimasoq,
- 2) aktiaatileqatigiiffik imaluunniit piginneqatigiiffik, Kalaallit Nunaanni nalunaarsorsimasoq, pisortatullu ilaasortani amerlanerussuteqartut danskisut innuttaassuseqartut, Kalaallit Nunaannilu najugaqartoq, najugaqarsimallunilu minnerpaamik ukiuni 5-ni imminnut atasuni,
- 3) Kalaallit Nunaanni angerlarsimaffeqartoq ingerlatseqatigiiffik alla nr. 2-mi pineqanngitsoq, killeqartumik akisussaaffeqartoq, matumanissaaq aningaasaateqarfiit aamma peqatigiiffiit allat, pisortani ilaasortat amerlanerussuteqartut aamma siulersuisuni ilaasortat amerlanerussuteqartut danskisut innuttaassuseqartut, Kalaallit Nunaannilu najugaqartut, minnerpaamilu ukiuni atasuni 5-ini tamanna sioqqullugu najugaqarsimallutik,
- 4) aktiaatileqatigiiffik imaluunniit piginneqatigiiffik, filiaaleqartoq nalunaarsorsimasumik Inuussutissarsiornermut Ingerlatseqatigiiffinnullu Aqutsisoqarfimmi – Erhvervsstyrelsen-imi, imaluunniit ingerlatseqatigiiffik alla killeqartumik akisussaaffeqartoq, ingerlatsivimmi pineqartumi aqutsisuusoq danskisut innuttaassuseqartoq Kalaallit Nunaannilu najugaqartoq minnerpaamik ukiuni 5-ni imminnut atasuni, tamanna sioqqullugu, imaluunniit
- 5) ingerlatsivik pigineqarlunilu ingerlanneqartoq Namminersorlutik Oqartussanit imaluunniit kommunimit kommuninilluunniit arlaqartunit.”

2. § 3-mi imm. 3-ip kingornagut immikkoortumik nutaamik ilanngussisoqassaaq:

” Imm. 4. Naalakkersuisut najugaqarnissamut piumasaqaammiit imm. 3-miittumiit immikkut akuersisinnaapput, pissutsit immikkut ittut tamanna pisariaqartippassuk, matumanissaaq Kalaallit Nunaata avataani najugaqartuunissamut, tamanna ilinniagaqarnermik pissuteqarsimatillugu, isumaginninnermik pissuteqarsimatillugu, Kalaallini Oqartussat peqataaffigisimasaannik, imaluunniit ilaqutariinnermik pissuteqartillugu, tamatumani sanilliullugu pineqartup imm. 3-miittut piumasaqaatit naammassinissaat qanoq qanitsiginerai.”

Imm. 4-5 tamatuma kingorna imm. 5-6-ingussapput.

§ 5-imut

3. § 5, imm. 1, nr. 1, imatut oqaasertalerneqassaaq:

”1) Filmiliortarneq, filmernermi kulturi, filmertarfeqarnermi kulturi aamma Kalaallit Nunaanni filmfestivalertarnermi kulturi siuarsassallugit,”

4. § 5, imm. 1, nr. 9, imatut oqaasertalerneqassaaq:

”9) siuarsassallugit professioneliusumik filmiliortarneq eqqumiitsuliatut aamma piginnaasanik ineriartortitsivittut.”

§ 9-mut

5. § 9, imm. 1, imatut oqaasertalerneqassaaq:

” Siulersuisuni ilaasortat toqqagaanermi nalaani Kalaallit Nunaanni najugaqartuussapput, ukiunilu kingullerni 5-ini ataannartumik najugaqarsimassallutik, 18-ileereersimassallutik Inatsisartunilu, Folketingimi imaluunniit kommunalbestyrelsimi ilaasortaassanatik. Ilaasortat aamma Naalakkersuisuni ilaasortaassanngillat. ”

6. § 9-mi imm. 2-p kingorna nutaamik immikkoortutut ikkunneqassaaq:

” *Imm. 3.* Naalakkersuisut najugaqarnissamut piumasaqaammiit imm. 1-imiittumiit immikkut akuersisinnaapput, pissutsit immikkut ittut tamanna pisariaqartippassuk, matumanissaaq Kalaallit Nunaata avataani najugaqartuunissamut, tamanna ilinniagaqarnermik pissuteqarsimatillugu, isumaginninnermik pissuteqarsimatillugu, Kalaallini Oqartussat peqataaffigisimasaannik, imaluunniit ilaqutariinnermik pissuteqartillugu, tamatumani sanilliullugu pineqartup imm. 1-imiittut piumasaqaatit naammassinissaat qanoq qanitsiginerai.”

§ 11-mut

7. § 11, imm. 1, imatut oqaasertalerneqassaaq:

” Siulersuisuni ilaasortat ukiunut 2-nut ilaasortassatut toqqarneqartassapput.”

§ 20-mut

8. § 20, imm. 1, imatut oqaasertalerneqassaaq:

” Kalaallit Nunaanni Filminstitutti pisinnaavoq aningaasanut inatsimmi aningaasat akuersissutaasut iluanni aningaasaliinissamut aningaasartuutinut matussutissat 25 procentiannik Kalaallit Nunaanni aningaasartuutigineqarsimasunut nunani allamiut filmiliaannut, matumanissaaq malittarisassat tak. § 21 naapertorlugu.”

§ 30-mut

9. § 30, imm. 1, imatut oqaasertalerneqassaaq:

” Nunanit allaneersut producentit tamarmik aningaasarsiutigalugu Kalaallit Nunaanni filmiliorusuttut, Kalaallit Nunaanni Filminstituttimut akuersissummik qinnuteqartassapput,

tamatumunngalu atatillugu allaffissornermut aningaasartuutitut akuersissummullu matussutissamik akitsuummik akiliuteqartassallutik. Tamannali taamaattoq tusagassiortunut atuutinngilaq.”

Allannguutissatut siunnersuummut oqaaseqaatit

Nalinginnaasumik oqaaseqaatit

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap siunnersuummik aappassaaneerinninnermut atatillugu Naalakkersuisunik kaammattuisimapput allannguutissatut siunnersuuteqarnissamik, siunnersuummi aalajangersakkanut arlaqartunut atatillugu. Ataatsimiititaliarlu ilassutitut kaammattuuteqarpoq ilassutitut isumaliutissiissummi siunnersuummik aappassaaneerinninnerup nangeqqinneqarneranut atatillugu allannguutissanik.

Allannguutissatut siunnersuut siunertaqarpoq ataatsimiititaliap kissaataanik naapigiaanissamik allannguutissatut siunnersuutaasunik.

Allannguutissatut siunnersuummi pissutsit makkua pineqarput:

- 1) Sumi najugaqartuunissamik piumasaqaammik sakkortuseriartitsisoqarpoq kalaallinik nioqutissiortartunik suussusiliinermi (siunnersuummi § 3).
- 2) Siunertanik aalajangersakkami allannguisoqarpoq siunnersuummi § 5, imm. 1, nr. 1-imi, imaalillugu siunertaasoq aamma filmiliornermut atasunik festivalertarnerit siuarsarneqassasut.
- 3) Allannguisoqarpoq siunnersuummi siunertatut aalajangersakkami § 5, imm. 1, nr. 9-miittumik, taamalu aalajangersakkami aalajangersimajunnaarlugu qanoq iliornikkut filminstituttip misileraalluni filmiliornermi eqqumiitsuliornerit aamma piginnaasanik ineriartortitsinerit siuarsarneqassanersut pillugit. Taamaasilluni aalajangersagaajunnaarpoq filminstituttip filmiliornermik ingerlatsivimmik ingerlatsisuunissaa.
- 4) Najugaqarnissamik piumasaqaat sukaterneqarpoq siulersuisuni ilaasortassanik toqqaasarnermut atasumik (siunnersuummi § 9).
- 5) Siulersuisutut sulinissamut piffissaliussaq allanngortinneqarpoq ukiunit 4-aniit ukiunut 2-nut. (siunnersuummi §11, imm. 1).
- 6) Erseqqissarneqarpoq aningaasartuutinik matussusiisarnermik aqqissuussineq taamaallaat atuummat nunani allamiunut nioqutissiortunut (siunnersuummi § 20).
- 7) Piumasaqaat aningaasarsiutigalugu filmiliornissamut akuersissummik qinnuteqartoqartassasoq allanngortinneqarpoq, taamaallaat nunani allamiunut nioqutissiortunut atuuttut (§30, imm. 1).

Najugaqarnermut aalajangersakkap sakkortusineqarnera siunertaqarpoq qularnaariniarnermik nunatsinnut nukittuumik atasuunermik kalaallisut nioqqutissiortutut isigineqassagaanni, aammalu Kalaallit Nunaanni Filminstituttimut siulersuisuni ilaasortatut toqqagaasinnaanermi. Ataatsimiititaliap tamanna pillugu kaammattuutaanut naapertuuttumik ilanngunneqarpoq immikkut ittumik akuersissuteqarsinnaanermut periarfissaq najugaqarnermut aalajangersakkap sanioqqunneqarsinnaaneranut, pissutsit immikkut ittut atuunneranni.

Allannguneq siunnersuummi siunertamut aalajangersakkamik siunnersuummi § 5, imm. 1, nr. 1-imiittoq aamma siunertaqarpoq filmfestivalkulturimik siuarsaaniarnermik, tunngaveqarlunilu filmertarfeqannginneranik nunatsinni sumiiffinni arlaqartuni, aamma taamaaliornikkut siuarsarneqarsinnaammat filmertarnermut festivalertitsisarneq, sumiiffinni filmertarfeqanngitsuni.

Allannguneq siunnersuummi siunertatut aalajangersakkamik § 5, imm. 1, nr. 9-miittumik siunertami aalajangersagaajunnaarlugu qanoq aaqqissuussinikkut filminstituttip eqqumiitsuliorluni filmiliornermik siuarsaanissaanik aamma piginnaasanik ineriartortitsineq eqqarsaatigalugu tunngaveqarpoq, ataatsimiititaliap kaammattuutigimmagu aalajangersakkap filminstituttip filmiliornermik ingerlatsivimmik ingerlatsisuunissaa peerneqassasoq.

Siulersuisut atuuffissaannik piffissamik allannguneq siunertaqarpoq qularnaariniarnermik pitsaanerusumik periarfissaqarnissamik inuit piginnaanillit filmiliornermik inuussutissarsiummi filminstituttip siulersuisuini inissaqassasut.

Aningaasartuutunik matussusiisarnermik aaqqissuussinerup allannguutaa taamaallaat nunanit allaneersunut nioqqutissiortunut atuuttuuneranik siunertaqarpoq qularnaarumaneqarmat nunani allamiut filmiliorartut nunatsinnut soqutiginnilernissaannik. Film.gl-ip oqaatigaa tamanna isumaqatigigitsik.

Aalajangersakkamik allanngunerme taamaallaat aningaasarsiutigalugu ingerlatsinerme akuersissummik qinnuteqartoqartarnissaanik tunngaveqarpoq, pissusissamisuunngitsutut nalilerneqarmat kalaallinut matumani nioqqutissiortunut atuuttumik qinnuteqartitsisoqartarnissaa, maanna kalaallit filmiliaannut qinnuteqartarnermik aaqqissuussineqareermat matumani, qinnuteqaatinik suliaqartarnikkullu filminut pineqartunut ilisimasassanik peqareermat, matumani aamma paasissutissanik qitiusunik filmiliornikkut suliniutinut tunngatillugu.

Allannguutissatut siunnersuutip aningaasatigut kingunerisassai

Naatsorsuutigineqanngilaq allannguutissatut siunnersuutit aningaasatigut kinguneqarnissaat.

Siunnersuummi siunertatut aalajangersakkamik § 5, imm. 1, nr. 9-miittunik allannguneq kinguneqassaaq immikkut aningaasaliissutissanik ingerlatsinermut filmiliornermik ingerlatsivimmik immikkoortitsisoqassanngitsoq.

Aningaasartuutitut matussutissanik tapiissuteqartarnermik aaqqissuussinerup allanngortinneqarnerata kingunerissavaa taarsiissutit taamaallaat atorineqartarnissaat nunani allamiunut nioqqutissiortunut, tamannalu siunertaareersimavoq. Allanguut aningaasanut inatsimmut kinguneqassanngilaq.

Allanguutissatut siunnersuummi aalajangersakkanut ataasiakkaanut oqaaseqaatit

Nr. 1-imut

Aalajangersagaq § 3, imm. 3-miittoq allanngortinneqassaaq Kalaallit Nunaanni najugaqartuunissamut piumasaqaatip allanngortinneqarneranik Kalaallit Nunaanni najugaqartuunissamik piumasaqaatip aamma minnerpaamik ukiuni 5-ini imminnut atasuni siumoortumik najugaqareersimanissamut aaqqissuunneqarneratigut. Allanguineq pissaq aalajangersakkani tamani najugaqartuunissamik piumasaqaateqarfiusuni, tassalu § 3, imm. 3, nr. 1-4-mi.

Najugaqarnermik piumasaqaat atortuussaaq tapiiffigineqarnissamik qinnuteqarnermi, taamaallaat qinnuteqartoqarsinnaammat kalaallit filmiliaannut aamma filmilioqataaffigisaannut. Najugaqartuunissamik piumasaqaat tamatumunnga atatillugu piffissami qinnuteqarfiusumi naammassineqartussaassaaq. Kalaallit filmiliaat taamaasillutik tassaapput filmiliat kalaallinik nioqqutissiortoqartut - producenteqartut -, nioqqutissioqataaffiusunullu filmilianut piumasaqaataavortaaq minnerpaamik filmilioqataasooq ataaseq kalaaliussasooq.

Najugaqartuunissamik piumasaqaammut ilanngullugu atuutissaaq filmiliap akuersissuteqarfiusimanissaa aningaasarsiuugalugu Kalaallit Nunaanni filmiliatut. Allanguutissatut siunnersuummi matumani siunnersuutaavoq aalajangersakkamik allannguisoqarnissaa (§ 30-imik) taamaallaallu atuutissalluni nunani allamiunut filmiliortunut, taamaammallu tamatumunnga atatillugu taamaallaat pisariaqassaaq uppersarsinnaassallugu nioqqutissiortup kalaaliunera, akuersissutitut piumasaqaammut ilaangikkaanni.

Nr. 2-mut

Aalajangersakkap Naalakkersuisut periarfissaqartippai immikkut akuersissuteqarsinnaanermik najugaqarnermut aalajangersakkap imm. 3-miittup saneqqunneqarnissaanik, pissutsit immikkut ittut atuussimatillugit, matumani aamma pissutsit aalajangersakkami eqqaaneqareersut.

Nr. 3-mut

Filmfestivalernertut paasineqassaaq pisoq arlalinnik filminik takutitsiviusoq, nalinginnaasumik filmilianik nutaanik takutitseqqaarfiusoq, filmillu immikkut toqqakkat unammiffigisaat malittarisassat naapertorlugit nersornaatisiffiusussat. Festivalit ilaasaa sammisaq qulequtarluunniit aalajangersimasooq sammisarpaat.

Filmfestivalertarnerni kulturi oqariartortuusarpoq kissaateqarnermik filmilianik takusaaqqusinermik.

Nr. 4-mut

Aalajangersakkami aalajangersagaajunnaarpoq qanoq siunertatut aalajangersakkap naammassineqarnissaanik piumasaaqat. Tamatumalu kingunerisaanik Kalaallit Nunaanni Filminstituttip nammineq nalilertussaavaa siunertap qanoq naammassiniarneqarnissaa. Tamanna assersuutigalugu pisinnaavoq pikkorissartitsisarnikkut, workshops-ertitsisarnikkut aamma allatigut piginnaasanik ineriartortitsinikkut. Aamma periarfissaavoq filminstituttip suleqateqalersinnaanera aammalu allatigut isumaqatigiissuteqarsinnaanera allanut suliasamik isumaginnittussanut, assersuutigalugu filmiliornermik ingerlatsivimmut.

Nr. 5-imut

§ 9, imm. 1-imi aalajangersagaq allanngortinneqarpoq Kalaallit Nunaanni najugaqartussaaneermik piumasaaqatip aallaaviusutut minnerpaamik ukiunik 5-inik ataavartumik tamanna sioqqullugu sivisussuseqarnissaatigut.

Nr. 6-imut

Aalajangersagaq periarfissaqartitsivoq Naalakkersuisut immikkut najugaqarneq pillugu imm. 1-imi aalajangersakkamik sanioqquטיםinnaaneq pillugu periarfissaqarnerannik, pissutsit immikkut ittut tamanna pisariaqartikkaangassuk, matumani aamma aalajangersakkami eqqaaneqartut.

Nr. 7-imut

Aalajangersagaq allanngortinneqarpoq piffissap siulersuisutut atuuffiusussap ukiunit 4-niit ukiunut 2-nut aalajangiunneqarneratigut. Periarfissaqarmallu toqqagaaqqissinnaaneq siunnersuummi § 11, imm. 1 naapertorlugu ataavartumik ingerlatsisoqarsinnaaneranut periarfissaqarluni siulersuisuni sulinermi, minnerunngitsumik siulersuisuni ilaasortat ilaasa toqqagaaqqittarnerisigut.

Nr. 8-mut

Aalajangersakkap erseqqissarpaa aningaasartuutinut matussutissanik tapiissuteqartarnermik aaqqissuussineq taamaallaat nunani allamiunut nioqqutissiortunut atuuttuusoq.

Nr. 9-mut

Aalajangersakkap erseqqissarpaa akuersissummik peqarnissamik piumasaaqat taamaallaat atuummat nunani allamiunut nioqqutissiortunut.